



ATASSUT
Postboks 399
3900 Nuuk
+299323366
Fax: +299325840
Atassut@greenet.gl
www.atassut.gl

Nuuk 19. december 2006

Inatsisartut suleriaasianni § 36, immikkoortoq 2 naapertorlugu matumuuna imaattumik Naalakkersuisunut apeqquteqarpugut:

Apeqqut: Royal Greenland A/S-ip naatsorsuutai kingullit aallaavigalugit suliffeqarfissuup niuernikkut ineriartortinneqarnissaanut periaatsit pillugit Naalakkersuisut qanoq isummersuuteqarpat aammalu qanoq naatsorsuutigisaqarpat – aammalu suliffeqarfissuup niuernikkut periaaserisassai nunatsinnilu suliassai pillugit suliffeqarfissuup ataatsimeersuarnissaani tullermi siunnerfiusussanik oqariartuuteqassamaarpat?

(ATASSUT-ip Inatsisartuni ilaasortaaitai: Augusta Salling, Ellen Christoffersen, Kristian Jeremiassen, Thomas Kristensen, Godmand Rasmussen)

Tunngavilersuut:

Royal Greenland A/S-ip naatsorsuutitigut 2005/2006-imi angusai pillugit 11.12.2006-mi ullulerneqartumik tusagassiutitigut nalunaarummi atuarneqarsinnaavoq suliffeqarfissuup kaaviiartitai 768 mio. kr.-inik amerleriarsimasut, tamannalu angusaavoq pitsaasoq. Taamaattorli ilanngullugu oqaatigineqarpoq suliffeqarfissuup akileraarut peernagu sinneqartoorutai 65 mio. kr.-iusimasut siorna 131 mio. kr.-iusimallutik, tassa angusat 81 mio. kr.-inik ajorseriaateqarsimapput.

Ajorseriaat Royal Greenland A/S-imit tunngavilersorneqarpoq ”suliffeqarfissuup raajaleriffiutaasa tunisassiorsinnaassusai aqutsisunit sukumiisumik naleqqussarneqarsimasut”, tamannalu kinguneqarsimasoq Narsami Aasiannilu fabrikinik matusisariaqalernermik, taamatuttaaq suliffeqarfissuup Norgemi raajalerinermik suliani tamaasa annaasaqarluni unitsissimagai. Tunngavilersuummut ilanngullugu oqaatigineqarpoq nunatsinni raajalerinermik suliaqarneq ukiut naatsorsuusiortifiusuni kingullerni suliffeqarfissuarmut 50 mio. kr. sinnerlugit annaasaqarfiusimasoq.

Naak massa ATASSUT-mit paasilluarsinnaagaluarlutigu suliffeqarfissuaq naleqqussartuartaqartoq, pingaartumik nunanut allanut aalisarnikkut aalisakkerinikkullu unammillikkanut, pingaartumik Canadamut, sanilliulluni naleqqussaasariaqartoq nukittorsartariaqartorlu, taamaattoq nunatsinni suliffissuaqarnerup siunissaa pillugu ATASSUT-mit annertuumik isumaaluppugut, tassami Royal Greenland A/S arlaleriarluni

kalerrisaarisarpoq nunatsinni suliffissuarnik ingerlatsineq akisuallaartoq ingerlatsinermullu aningaasartornarpallaarluni.

Taamaamat Royal Greenland A/S-ip naatsorsuutai kingulliit aallaavigalugit suliffeqarfissuup niuernikkut ineriartortinneqarnissaanut periaatsit pillugit Naalakkersuisut qanoq isummersuuteqarpat aammalu qanoq naatsorsuutigisaqarpat? Aammalu suliffeqarfissuup niuernikkut periaaserisassai nunatsinnilu suliassai pillugit suliffeqarfissuup ataatsimeersuarnissaani tullermi siunnerfiusussanik oqariartuuteqassamaarpat?

Tamatumalu saniatigut makku akineqarnissaat kissaatiginartipparput:

1. Nunatsinni aalisakkanik suliffissuaqarnerup ineriartortinneqarnissaata niuernikkut akilersinnaannginneranik oqariartuuteqartoqartarnera pillugu paasissutissanik itisiliisunik pissarsiniarnissamik Naalakkersuisut pilersaaruteqarpat?
2. Naalakkersuisut naammaginartumik tunngavissaasinnaasunik ilisimasaqarpat ilumut suliffeqarfissuup nunani allani aalisakkanik suliffissuaqarnera tassatuaasoq suliffeqarfissuup sinneqartooruteqartarneranut aallaavioq? Matumani innersuussutigaarput suliffeqarfissuup nunatsinni annasaqartarnerarluni oqariartuuteqartarnera.
3. Suliffeqarfissuup aningaasanik isaatitsiffii, matumani aamma nunatsinni isaatitsiffii, pillugit paasissutissanik ersarissunik ATASSUT tunineqarnissaminik qinnuteqarpoq.
4. Royal Greenland A/S-ip Polenimi aalisakkanik suliffissualiornera pillugu paasissutissinneqarnissamik Naalakkersuisut qinnuigaavut.
5. Royal Greenland A/S-ip qaleralinniarnermik kaaviiartitai kaaviiartitaanut allanut sanilliullugu qanoq annertutiginersut pillugu Naalakkersuisut paasissutissinissaat kissaatiginarpoq.
6. Taamatutaaq Naalakkersuisut qinnuigaavut ilisimatitsissutigeqqullugu qalerallit suliffeqarfissuup nammineq piasarai aammalu aalisartunit pisai qanoq annertutigisut nunatsinni suliarineqartarnerisut.
7. Suliffeqarfissuup piffissamut qaninnermut ungasinermullu taarsersugassatut akiitsui tamakkiisut pillugit paasissutissanik nassuiaatitalinnik Naalakkersuisut qinnuigineqarput tunniusseqqullugit.
8. Royal Greenland A/S-ip tamakkiisumik ilaannakortumilluunniit namminersortunngorsarneqarnissaa pillugu nutaanik alloriartoqarpa?
9. Nunatta nunarsuarmi aalisarnermik, matumani raajarniarnermik, qaleralinniarnermik, saattuarniarnermik allanillu aalisakkanik niuruteqarnermik, aallutaqartut akornanni unammillersinnaassuseqarnera nukitorsarniarlugu Naalakkersuisut iliuusissanik pilersaaruteqarpat?

Piaartumik akineqarnissarput naatsorsuutigaarput, akissutillu ukununnga nassiunneqassasut kissaatigaarput:

aus@gh.gl krje@gh.gl thok@gh.gl gora@gh.gl ekri@gh.gl kiisalu landstinget@gh.gl



Qujanaq.

ATASSUT
Postboks 399
3900 Nuuk
+299323366
Fax: +299325840
Atassut@greennet.gl
www.atassut.gl